

आकाशवाणी जयपुर-अजमेर
प्रादेशिक समाचार

दिनांक 22.10.2025

समय: 18.45 बजे

- देश रो नवीकरणीय ऊर्जा बूतो साल 2014 रे मुकाबले पांच गुणा बत्ती बध ने 197 गीगावाट व्हयो।
- राज्य मांय मोटा प्रशासनिक फेरबदल रे तैत-34 आईपीएस अहलकारां री बदली-ठावा आईपीएस गोविन्द गुप्ता एसीबी रा नुवा महानिदेशक अर सचिन मित्तल जयपुर रा पुलिस आयुक्त बण्या।
- दीपोत्सव रे तैत आज प्रदेश मांय गोवर्धन पूजा अर अन्नकूट पर्व रीत मुजब मनाया जावे।
- सूचना अर प्रसारण मंत्रालय खास अभियान 5.0 रे तैत चार सौ 93 आउटडोर अभियान चलाया अर 9 सौ 73 ठौड़ां अर 1 सौ 4 वाहनां री सफाई करी।

000

देश रा नवीकरणीय ऊर्जा बूता मांय उल्लेखजोग बढवार व्ही है। ओ साल 2014 रे मुकाबले 35 गीगावाट री तुलना मांय पांच गुणा ऊँ बत्ती बध ने 197 गीगावाट व्ही है। मोटा पन बिजली संयंत्रों ऊँ पन बिजली रे अलावा है। नवीन अर नवीकरणीय ऊर्जा मंत्रालय बतायो के सरकार साल 2030 ताई 500 गीगावाट गैर-जीवाश्म ऊर्जा रो महत्वशाली लगस राख्यो है। चालता साल केन्द्रीय नवीकरणीय ऊर्जा कार्यान्वयन एजेंसियां पांच दशमलव छह गीगावाट जदके राज्य एजेंसियां साढे तीन गीगावाट बिजली खरीद सारु संविदा मांगी है।

000

नौसेना कमांडरां रो अर्धवार्षिक सम्मेलन आज नुवी दिल्ली मांय सरु व्हयो। ऑपरेशन सिंदूर रे पछे नौसेना रा भावी अभियानां अर तियारियां रे बीचे तीन दिन रो ओ सम्मेलन महताऊ मान्यो जावे। ओ राष्ट्रीय अगुवाई अर नौकरशाही रे बीचे कने संपर्क अर संवाद रो असरदार मंच है। रक्षा मंत्री राजनाथ सिंह काले नौसेना कमांडरां सामी बोलेला अर विकसित भारत-2047 री रूपरेखा प्रस्तुत करेला। प्रमुख कमांडरां रे साथै नौसेना प्रमुख भारतीय समुद्री हलका मांय हिफाजती हालात रा बारा मांय योजनावां री समीक्षा करेला।

0000

सगळा राज्या अर केंद्रशासित प्रदेशां रा मुख्य चुणाव अहलकारां रो सम्मेलन आज ऊँ नुवी दिल्ली मांस सरु व्हयो। चुणाव आयोग कानी ऊँ दो दिन चालण वाळा ई सम्मेलन मांय मतदाता सूची ऊँ जुड्या खास गहन पुनरीक्षण मुद्दा माथे विगतवार चर्चा व्हे री है। ई दौरान आवता मतदाता सूची पुनरीक्षण री प्रक्रिया ने बत्ती असरदार अर पारदर्शी बणावण रा उपाया माथे चर्चा करी जायेला।

000

बारां जिला रा अन्ता विधानसभा उपचुनाव सारु नियुक्त व्यय पर्यवेक्षक मुकेश राठौर उम्मीदवारां अर राजनीतिक दलां रा नुमाइन्दा रे साथे बैठक ली। वणा स्वतंत्र अर निष्पक्ष चुणाव सारु निर्वाचन आयोग रा दिशा-निर्देशां अर लोक प्रतिनिधित्व अधिनियम री पूरी पालना तैय करण ने कह्यो। वणा चुनावी खर्च री सीमा समेत कानूनी प्रावधानां री पालन जरूरी बताया। ई उपचुणावा सारु 21 उम्मीदवारां 32 नामपाना भर्या है। काले नामपाना री जांच व्हेला।

राज्य आज एक मोटा प्रशासनिक फेरबदल रे तैत 34 आईपीएस अहलकारां री बदली कर दीरीजी है। कार्मिक महकमां रा आदेश मुजब ठावा आई.पी.एस. गोविंद गुप्ता ने भ्रष्टाचार निरोधक ब्यूरो रा महानिदेशक रा ओहदा माथे लगायी ज्या है। वठे ई आनंद कुमार श्रीवास्तव ने महानिदेशक पुलिस स्पेशल ऑपरेशन्स रा रूप मांय नियुक्त करी ज्या है। राजधानी जयपुर मांय सचिन मित्तल ने बीजू जॉर्ज जोसफ री ठौड़ नुवा पुलिस आयुक्त नियुक्त करी ज्या है। इण रे अलावा पांच आई.पी.एस. अहलकारां ने अतिरिक्त चार्ज दीरीज्यो है।

00000

दुनिया मांय ख्यात नाम पुष्कर पशुमेळो आज ऊँ सरु व्हे ग्यो है। तीन चरणां मांय आयोजित होवण वाळा ई मेळा मांय न्यारा-न्यारा राज्यां ऊँ ऊंट अर घोड़ा बिकवाळी सारु लाया जावे। पशुपालना मेहकमां रा संयुक्त निदेशक सुनील घीया बतायो के पशुपालन मेहकमो मेळा मांय आवण वाळा मवेशी पालका सारु खास बन्दोवस्त कर्या है। पशु मेळा रे साथे ई धार्मिक मेळा रे दौरान न्यारा-न्यारा कार्यक्रम व्हेला एक रपट-

00000

दीपोत्सव रे तैत आज प्रदेश मांय गोवर्धन पूजा अर अन्नकूट पर्व उमाव रे साथे मनाया जावे। गोवर्धन पूजा सारु सिरधालू गोबर ऊँ रीत मुजब गोवर्धन री मूरत बणायी अर आस्था रे साथे पूजा-अर्चना करी। इण रे पछे भेळी परिक्रमा ई करी। गोवर्धनजी री सात कोसीय परिक्रमा रा मार्ग मांय आवण वाळां डीग जिला रा पूंछरी का लौठा मांय संवारा ऊँ ई तिवार री रंगत दिखी। पाली मांय गोवर्धन पूजा रो आयोजन करी ज्यो। अलवर रा जगन्नाथ जी मंदिर मांय मूंग, चावल, बाजरा रा खास गोवर्धन पर्वत बणायी ज्या। साथे ही भजन कीर्तन रा कार्यक्रम व्ह्या। झुंझुनू मांय संवारा ऊँ ई श्री कृष्ण मिन्दर मांय सिरधालूआं री भीड़ री। वठे ई सिरोही ऊँ म्हाणा खबरनवीस बतायो के जिला रा वासा गांव मांय आज रीत मुजब गाय दौड़ रो आयोजन व्ह्यो।

00000

धौलपुर मांय गोवर्धन बणा र पूजा-अर्चना अर परिक्रमा करी ज्यी। साथै ई आतिशबाजी व्ही। बारां मांय ई गोवर्धन तिवार रीत मुजब मनायी ज्यो अर मिन्दरां मांय अन्नकूट राख्यी ज्यो। आज अन्नकूट माथे जयपुर रा न्यारा-न्यारा मिन्दरां मांय प्रसाद ई बाटी ज्यो। पाली मांय 56 भोग री झांकी सजायी ज्यी। वठे ई चित्तौडगढ़ मांय ई रीत मुजब अन्नकूट रो आयोजन कर्यो जावे।

00000

कोटा, सलूम्बर, डूंगरपुर, झुझुनूं मांय अन्नकूट रा व्यंजन बणायी ज्यो अर प्रसाद बांटी ज्यो। काले भाई दूज रे साथे दीपोत्सव पूरण व्हे जायेला।

000

उत्तर-पश्चिम रेलवे कानी ऊँ दिवाळी अर छठ पूजा ने देखता 98 खास रेलगाड़ी चलायी जावे। आ रेलगाड़ियां रा 956 फेरा व्हेला। इण रे साथै ई 60 नियमित रेलों मांय 175 बत्ती डिब्बा जोड़ी ज्यो है। उत्तर-पश्चिम रेलवे रा महाप्रबंधक अमिताभ बतायो के खास टेशनों माथे भीड़ काबू करण सारू खास इन्तजाम करी ज्यो है। टेशन परिसर मांय जातरियां ने रोकण सारू होल्डिंग एरिया बणायी ज्यो है।

000

प्रदेश मांय काले कुछ ठौड़ा बादळ छाया रहवण अर कठे-कठे ई हल्की बिरखा अर छांटां-छीडका ऊँ तापमान मांय बढ़वार व्ही है। सब ऊँ कम 16 डिग्री सेल्सियस तापमान सिरौही मांय दर्ज व्ह्यो, जिला रा माउंटआबू मांय ई बीचे गुलाबी ठण्ड रे कारण लोग गरम कपड़ा मांय निजर आवण लाग्या है। भरतपुर मांय ई सांझ-संवारां हल्की ठण्ड रे बीचे खेता मांय सियाळू फसला री बीजायी सारू गहमागहमी बध ग्यी है। एक रपट-

00000

ई बीचे मौसम महकमो कह्यो है के कोटा, उदयपुर संभाग रा कुछ हलकां मांय 25 अक्टूबर ऊँ 28 अक्टूबर रे बीचे बादळ छाया रहवण अर कठेई-कठेई बिरखा होवण री आस है।

000

भाला फेंक खिलाड़ी नीरज चोपड़ा ने भारतीय सेना मांय लेफ्टिनेंट कर्नल री मानद सनद दीरीजी है। आज नुवी दिल्ली मांय रक्षा मंत्री राजनाथ सिंह अर सेना प्रमुख जनरल उपेंद्र द्विवेदी री मौजूदगी मांय व्ह्या जळसा मांय नीरज ने आ सनद दीरीजी। नीरज री वर्दी माथे वां रा नुवा ओहदा रा प्रतीक चिन्ह लगा र वां ने आधिकारिक रूप ऊँ पदोन्नत करी ज्यो। नीरज चोपड़ा दो बार ओलंपिक तमगा जीत चुक्या है।

000

सूचना अर प्रसारण मंत्रालय खास अभियान 5.0 रे तैत चार सौ 93 आउटडोर अभियान चलाया अर 973 ठौड़ां अर 104 वाहनां री सफाई करी। मंत्रालय बतायो के अभियान रे दौरान एक लाख 43 हजार किलो कबाड़ रो निपटान करी ज्यो। इण मांय मंत्रालय ने 34 लाख रिप्यां ऊँ बत्ती रो राजस्व मिल्यो अर 8 हजार वर्ग फुट ऊँ बत्ती ठौड़ खाली व्ही। अभियान रे तैत 301 जन शिकायतां रो निपटारो करी ज्यो।

000

स्वास्थ्य मंत्रालय कह्यो है के सीपीआर जागरूकता सप्ताह रे दौरान देश भर मांय 6 लाख 6 हजार ऊँ बत्ती प्रतिभागियां ने सी.पी.आर. प्रशिक्षण दीरीज्यो। मंत्रालय री व्यापक भागीदारी अर जागरूकता तैय करण सारू पूरा हफ्ता केई गतिविधियाँ आयोजित करी ज्यी। कोई 79 हजार लोगां माई गोव प्लेटफॉर्म री मार्फत डिजिटल प्रतिज्ञा ली।

000

प्रधानमंत्री नरेन्द्र मोदी ई महीना री 26 तारीख ने आकाशवाणी ऊँ प्रसारित कर्या जावण वाळा खास कार्यक्रम “मन की बात” मांय विचार बतावेला। आ ई कार्यक्रम री 127वीं कड़ी व्हेला। ई सारू आप ई मुफ्त नम्बर 1800-11-7800 माथे सुझाव भेज सको हो। ई रे अलावा नरेन्द्र मोदी एप अर माय जीओवी ओपन फोरम रे जरिये ई विचार भेज्या जा सके है। इण बाबत आप 24 अक्टूबर ताई राय भेज सको हो। ओ कार्यक्रम आकाशवाणी अर दूरदर्शन रा पूरा नेटवर्क, आकाशवाणी समाचार री वेबसाइट अर न्यूज़ ऑन ए आई आर मोबाइल एप माथे ई प्रसारित कर्यो जावेला। मन की बात कार्यक्रम रो प्रसारण आकाशवाणी समाचार, डीडी न्यूज़, प्रधानमंत्री रा दफ्तर अर सूचना अर प्रसारण मंत्रालय रा यू-ट्यूब चैनलां माथे ई कर्यो जावेला।

0000